

Spitgar aunc 30 dis e recaltgar 30 milliuns francs

L'Energia Alpina ha survegniu la lubientscha da baghegiar per l'ovra da fotovoltaica SedrunSolar el territori da Scharinas e Cuolm Val en Val Tujetsch. Il medem mument ha igl Inspectorat federal per current ferm dau la lubientscha per las lingias da colligiazion e las staziuns da transformatur. Ils proxims meins duei la finanziaziun da quei implont che cuosta rodund 80 milliuns francs vegnir reglada, silsuenter san las lavurs da baghegiar entscheiver.

HANS HUONDER/FMR

Rodund in miez onn suenter che l'Energia Alpina ha inoltrau la damonda da baghegiar pigl implont da fotovoltaica SedrunSolar ei la lubientscha persunter sin meisa. Sco quei che l'interpresa scriva en ina comunicaziun als mieds da massa, ha la regenza grischuna dau la lubientscha da baghegiar per l'ovra da fotovoltaica alpina el territori da Scharinas e Cuolm Val che sesanfla buca lunsch naven dil territori da skis da Sedrun. Arrivada ei medemamein la lubientscha digl Inspectorat federal per current ferm per las lingias da colligiazion e las staziuns da transformatur.

Spitgar aunc 30 dis

Aschia ein las premissas dadas per saver realisar il project da fotovoltaica SedrunSolar e da saver colligiar el immediatamein cullas lingias da transport dil current necessarias. Tuttina ha ei ussa aunc num spitgar ils 30 dis che lubeschan da far recuors. «Damai che nus havein schaffiu nies project el rom d'ina procedura da cooperaziun per las organisaziuns interessadas vid igl implont, quintein nus buca cun recuors», di *Claudio Deplazes*, president dil cussegl d'administraziun dall'Energia Alpina. Las discussiuns cullas organisaziuns per la protecziun digl ambient seigien stadas trasatras constructivas: «Tuttina stuein nus spitgar ussa quels 30 dis, pèr lu ha la lubientscha vigur legala.» Per l'Energia Alpina ei la lubientscha da baghegiar per quell'ovra in tiern historic. «Igl ei in project innovativ pigl avegnir», puntuescha Claudio Deplazes.

Ina gronda sfida

«Pil team da project e per las instanzas d'approbaziun dil cantun Grischun e dalla Confederaziun involvi ellas lubientschas, ei quei process staus ina premiera. Ina lubientscha da baghegiar cumparegliabla haveva ei buca dau entochen ussa en quella fuorma», scriva l'Energia Alpina en ina comunicaziun als mieds da massa. Diferentas damondas han stuii vegnir sclaridas e quei ha pretendiu dabia discuors denter plirs ufficis cantunals e federals. Quella fasa ha l'Energia Alpina nezegiau per cuntinuar cullas lavurs da planisaziun. Denter auter ei quei era stau il cass pertuccont la finanziaziun digl implont che duei



Ils responsabels pil project SedrunSolar selegnan dalla lubientscha da baghegiar obtenida dalla regenza grischuna. Da seniester il president communal Martin Cavegn, il president dil cussegl d'administraziun dall'Energia alpina Claudio Deplazes, il meinafatschenta dall'Energia alpina Ciril Deplazes ed il menader dalla partiziun d'energia regenerabla dall'Energia Alpina, Martin Cavegn.

FOTO MAD

producir igl avegnir energia electrica per 6500 casadas sin ina surfatscha da 320 hectaras. «Nus calculein cun cuosts totals da 80 entochen 85 milliuns francs. El rom dil SolarExpress savein nus quintar che la Confederaziun cuvieri 60% da quels cuosts. Davart igl Uffeci federal d'energia havein nus survegniu signals che quei duessi esser pusseivel. Aschia ha ei ussa num recaltgar rodund 30 milliuns francs per segirar il project. En damonda per cuvierer quella part finanziaia vegnan investurs e cun plirs dad els essan nus en discussiuns concretas. Quei ein denter auter era ovras d'electricitad che san surprender e vender ina gronda part dall'energia», di Claudio Deplazes e puntuescha: «En sesez ston duas componen-tas constar pil project SedrunSolar: L'emprema havein nus contonschiu ussa culla lubientscha da baghegiar e la secunda ei igl aspect dalla rentabilitad.» Suenter in'evaluaziun definitiva dils cuosts, respectivamein dalla finanziaziun dil project, vegnan il cussegl d'administraziun dall'Energia Alpina e la suprapostanza communal da Tu-

jetsch allura a decider definitivamein pertuccont la realisaziun dil project. L'ovra duei vegnir purtada d'ina nova societad acziunara cul num SedrunSolar.

Entschatta aunc uonn

Las lavurs da construcziun ein gia vegnidas publicadas e proximamein sa il team da projectaziun co las offertas vesan ora. La finamira ei da saver entscheiver cullas lavurs tonpli spert e da saver montar ulteriurs panels gia uonn. Em-prens panels ein gia installai e surveschan datas denter auter davart l'irradiazion dil sulegl el liug. «Nus essan dil meini ch'ei seigi realistic d'entscheiver cullas lavurs da baghegiar questa stad ni sil pli tard igl atun», di Claudio Deplazes. Pertuccont igl andament digl entir project lauda el la lavur dil pign team da projectaziun, mo era la promptadad ed igl interess dalla popu-laziun da Tujetsch da realisar quei project: «La fin finala ei l'entira surfatscha digl implont sin terren communal.»

LAAX

Canons, messa e body percussion

Il chor d'affons TICO da Laax ha dau siu tierz concert. Cun 32 scolaras e scolars ed in program variont.

Sonda avonmiezgi ha il chor d'affons TICO da Laax envidau a concert. Il num ei program e nuot auter che la scursanizium da «TiContas». Onn vargau eran 27 scolaras e scolars dall'emprema tochen la quarta classa sepresentai sin tribuna dall'aula Gra-va. Pigl onn da cant 2023/24 ein 32 dall'emprema tochen la tschunavla separticipai als exerchezis cun *Umberto e Rinaldo Camathias*. Ils dus frars han refundau in chor ch'existeva gia ils onns otgonta. Suenter il debut dil chor il matg 2022 ha TICO purschiu in niev divertiment musical.

La messa d'affons

Entschiet ha il concert cun ina body percussion, pia cant cun moviments. El center dil program d'uonn ei la messa d'affons da *Gion Balzer Casanova* cun text da sur *Giusep Venzin* stada. Ei se-capescha buca da sesez ch'in chor d'affons conta ina messa cun kyrie, gloria, offertori, sanctus ed agnus dei. Nov affons che con-tan cun TICO han giu gl'avrel Dumengi'Alva, aschia ch'igl ei stau ina caschun d'embellir la fiasta cun quella messa. Sco Rinal-do Camathias ha explicau, haveva el sez cantau ella avon 35 onns cul chor d'affons, *Gieri e René Spescha* havevan lezza gada fatg gl'accumpignament instrumental.

Gl'atun vargau ha il chor entschiet ils exerchezis. Gia da Nadal ha el envidau ils geniturs e fatg a quels ina sorpresa musicala. Al concert da sonda vargada han els fatg in plascher era a tatts e tats, fargliuns, augs ed ondas, padrins e madretschas. *Heidi Casutt-Cathomen* ha accumpignau al clavazin ed *Albert Spescha* alla ghitara. In'entschatta divertenta ei stada la canzun cul tetel «Ipp Zippelipp Zippelonikus» dil nanin cun in num liung e cumplicau.

Il chor ha aunc purschiu in bloc cun plirs canons, per exem-pel il spiritual «I wake up this morning». Cull'entira sala ha il chor cantau quel. La finala ha gl'auditori astgau tedlar era las treis canzuns che TICO vegn a presentar alla fiasta da cant districtua-la a Trun. (fmr/abc)



Il chor d'affons TICO en acziun, cul dirigent Umberto Camathias.

FOTO AUGUSTIN BEELI

SURSELVA

Il «dream team» dalla musica Mustér

L'entschatta seigi stau in s'approximar d'omisduas varts. Lucas Quinter da Mustér – ch'ha ina trisomia – sco era las musicistas ed ils musicists han giu d'emprender da vegnir en contact in cun l'auter, raquenta Olinda Hosang ch'ha mess en moviment d'integrar Lucas Quinter ella Societad da musica Mustér. Ferton ein els dus in team ch'armonisescha fetg bein.

RTR/FMR

Lucas Quinter suna bugen, insumma ha el fetg bugen la musica. Quei saveva era *Olinda Hosang*, ch'enconuscha Lucas Quinter e sia famiglia gia dapi biars onns. Aschia ha ella fatg inagada la proposta als geniturs da vegnir cun el ad ina prova dalla Societad da musica Mustér. «Quella emprema prova ei buca gartegiada aschi bein. Nus havein denton sempla-mein observau quella sera ed essan lu pu-spei turnai in temps pli tard ad ina ulter-iura prova.» Quei raquenta il bab *Alfons Quinter*. Aschia ha tut entschiet, avon varga sis onns.

Igl emprem pass ei il pli grev

All'entschatta hagien tuts giu da s'endis-ar in vid l'auter. Ei seigi stau in process per l'entira musica, di Olinda Hosang, ch'era avon la pensiun pedagogica curati-va. «Tut ils musicists e las musicistas fan sbagls, era jeu, ed era il Lucas, quei sau-da vitier», di Olinda Hosang vinavon: «Ei funcziuna. Lucas enrihescha nossa musica.»

Lucas Quinter fa percussiu e dat en il tact – ensemen cun Olinda Hosang. «Ei drova il sustegn dalla Olinda, che fa fetg gronda lavur. El sto esser accumpi-gnaus per ch'ei funcziuni», di *Renaldo Lutz*, in bassist: «Quei ei denton mai stau ina discussiun.» Ferton sefida Lucas Quinter cupleinamein dil tact che Olinda Hosang dat avon, ed aschia san ei

far tut la musica ensemen. Per aschidir in «dream team».

Ed era tenor ils musicists e las musi-cistas enrihescha Lucas Quinter la socie-tad. Ei hagi duvrau l'entschatta temps da s'endisar, sco era engaschi e bunaveglia dad omisduas varts. «Buca mo Lucas ha empriu e sa profitar dalla musica, mo-bein era ils musicists e las musicistas san

profitar da Lucas», di *Roland Cajacob*, che fa era percussiu.

Igl extraordinari daventa quotidian

Daferton ei tut daventau ina normalitad. Quei era grazia a l'aviartadad e la buna lu-na da Lucas Quinter. «El ha bunamein adina in surrir en fatscha», di *Andriu Hosang*: «Quei ei fetg lessig cun el ella musi-ca.» El fa part dalla Societad da musica

Mustér sco tut las autras e tut ils auters commembers era – duront emprovas, pro-ducziuns, e naturalmein era duront il star da cumpignia suenter la prova. E silla da-monda en il Telesguard dad RTR, sch'el fetshi era bugen musica, di Lucas quin-ter cuort e sec e cun in surrir: «Gie, bugen!»

Ina contribuziun da Telesguard davart Lucas Quinter e si'integraziun ella Societad da musi-ca Mustér ei da veser sin: rtr.ch.



Suenter la prova gaudan ils musicists e las musicistas da cumpignia in sitg el restaurant dil Punt treis.

FOTOS RTR



L'Olinda Hosang cul Lucas Quinter durant ina prova dalla Societad da musica Mustér.